

Juan Ösu

Juan Oso



Quechua de Huamalíes – Dos de Mayo,
Huánuco

Asociación Cristiana JAWCA
Pasaje San Mateo, Lote 05, La Esperanza – Amarilis
RUC: 20404799534
Huánuco – Perú – 2018

Ilustrador: Jhone Rosales Córdova

¤ 1 ¤

Unayshi juk warmi aywarqan chakrapa soqlukuq. Chakracho soqlukuykaptinshi elaqpita juk jatunkaray ösu yuripaykur warmita shawata-kurkur apakurqan warmin kananpaq. Sayshi warmiqa mansakaywan watpaskir qayakuytapis kamäpakurqansu. Sayshi ösuqa warmita patpatyay-kachaykaqta machayninman chäsirqan.



Say ösupa machayninqa jatunkaray qaqa chawpinchöshi karqan. Sayshi wanwanyaykaq qaqa chawpincho kaptin maypa yarqamunanpaqpis warmiqa karqansu. Saynöpis warmi mana

yarqamunanpaq jatunkaray läja rumiwanraqshi
machay punkutapis ösuqa sapaykunaq.

Saychöshi warmi waqalar waran waran
wichqaräkuq. Ösunashi warminta seqaypa
kuyashpan imaykatapis mikunanzaq waran waran
ashtaparqan. Saylamanshi yakutapis uylluwan
ashtapaq. Sayraqshiqa uyshatapis, kuchitapis,
wäkatapis y imayka munti uywakunapa aysantapis
apapaykuq. Sayno apapaptinshi warmiqa waran
waran chashlalarraq aysata ankapakurir mikuq.

☞ 2 ☞

Sayno kuyar shumaq rikaptinshi warmiqa say
ösawan yachakashna täkurqan. Ösuwan sayno
taykarshi warmiqa ösupa surinta qeshyaq rika-
kurqan. Qeshyaq kar antujashqankunatapis
lapantashi ösuqa warminta ashtapaq. Saypita killan
tinkurkuptinnashi warmiqa kuyaylapaq ösu
malwata qeshyakurqan.

Surin kuyaylapaq kikin niraq yuriykuptinshi
ösua kushikushpan saltaykacharqanraq. Sayshi
jinan höra aywar yayan yana carnita apamurqan
warminpa almentunpaq. Sayshi warmintaqa
qeshyakushqanpita sharkushqanyaq waran waran
sirvirqan. Warmin sharkurkuptinnashi ösuqa yapay
waran waran aywaq warminpaq y surinpaq mikuy
ashiq.

Ösu malwapaqa rinrinkuna ösupanöshi karqan. Cäranqa runapano karqan. Cuerpunshi isanqa seqaypa milwasapa karqan. Saynöpis makinkunaqa mamanpanöshi karqan. Chakinkunashi isanqa taytanpano karqan. Say ösu malwaqa winaylantashi seqaypa puklay siki karqan. Runanöpis ali yarpay-yuqshi karqan. Sayshi winaylanta parlaytapis yachakurqan maman parlashqannöla.

Wawan kuyaylapaq kaptinpis warmiqa runan ösu yarquriptin mamanpaq y castankunapaq waqalarshi tarqan. Sayno waqaqta rikarshi wawan ösu malwaqa mamanta kuyapashpan tapurqan imapita waqaykashqantapis. Sayshi mamanqa wilarqan castankunapaq lakikur waqaykashqanta. Sayshi ösu malwaqa yarpachakurqan imanöpapis say machaypita mamanta jorqunanpaq.

Sayshi puklakuqnöla punku saparaq jatunkaray läja rumita waran waran kuyusiq. Sayshi kalpan masna yurirkuptinqa juk kuticho taytan kutiykämushqanta mana musyar qaqa chawpinpita taytan jananman say läja rumita tanqariykurqan. Sayshi say läja rumiqa taytan ösutaqa pitiqpaq nitikur-purqan.

Taytanta rumi nitirashqanyaqlashi ösu malwaqa mamanta qaqa chawpinpita aparikurkur jorqamur-qan. Jorqurkuptinnashi mamanqa ösu malwata nirqan: “Kananqa jukla markapa qeshpikushun,

hiju”. Sayno nirshi warmiqa wawan ösuta pushakurkur markanpa qeshpir aywakurqan.



Karutana qeshpiykaptinshi awkis ösu kawarirkamur nitiraykaq läjata tanqariykur sharkurkurqan. Nirkurnashi warminta y surinta watukananpaqqqa kanaqnasu. Sayno mana tariykurshi seqayapa löcuyarraq kayläpa wakläpa pampata muskikachar warmin maypa aywashqantapis yupinpa qatiparqan.

Sayno qatipar taripan taripan qatipaykaptinshi warminqa markanman wawanta pushash yaykuriy-kurqan. Markaman warmin yaykuptinnami ösuqa markaman yaykuyta mansakushpan saylapitana yapay machayninman waqaraykar kutikurqan.

❀ 3 ❀

Markachönashi warmiqa mamanpa wayinman chaykuptin mamanqa kushikushpan rikarpis alman kashqanta yarparqan. Payqa yarparqan oqrakash kar unayna ushakäkushna kashqanta. Sayno yarparpis wawan kashqanta shumaq tantiyaykurshi makalakurkur waqarqan. Nikashqanchöshi ösu malwata rikaykur pasakaqtaraq mansakaykurqan. Sayshi wawanta nirqan: —;Imapaqtaq kay ösu malwataqa apaykamushkanki!

Maman sayno niptinshi wilaparqan ima päsashqantapis. Sayno wilapar say ösu malwapis wawan kashqanta wilaptinshi maman ima ruray-tapis kamäpakurqansu. Saypitanshi mamanqa nirqan: —Ay, imanäshuntaq, hija. Jina suertikichir sayno kanaykipaq karqan.

Saypitanshi maman kaqlacho lapan tarqan. Nirkurnami mamanqa yarpachakurir wawanta nirqan: —Wawaykita tayta cüraman apashun ushasinansipaq. Mana ushasishqaqa räyupis vientupis ushamäshunpaqmi. Saynöpis mana

ushasishqaqa capazchir supaypis wawaykita
apakunqapaq.

Sayno wilanakurkurnashi wamranpaq padrinuta
ashiyarqan. Sayshi runakunaqa awnikäyashqan-
chöpis ösu niraq kashqanta rikaykur pipis munar-
qansu padrinun kayta. Sayshi kikin cüratana
ruwakuyarqan padrinun kananpaq. Sayno ruwaku-
yaptinnashi cüraqa awnirqan. Nirkurnashi diyata
jitapänakuyarqan ushasinan junaqpaq.

Saypitashishi jitapänakuyashqan junaq chämup-
tin iglesiaman wawanta aparqan ushasinanpaq.
Ushasinanpaqnashi libruman jutinta churananpaq
tayta cüraqa tapurqan ima jutin kashqantapis.
Sayshi jutiynaq wawan kashqanta wilaptin kikin
tayta cüra nirqan Juan Ösu jutin kananpaq.



Say jutiwan ushasishqanpitash Juan Ösuqa
“päkilä, padrinu” nir cürapa makinta musarqan.
Nirkurqa kushikushpan qoshparqan. Saypitash
pimaypis Juan Ösulapana say wamrata reqiyaq.

¤ 4 ¤

Juan Ösuqa shakshaylantashi seqaypa traviësu
karqan. Sayshi awilanpis mamanpis seqaypa
ajayarqan mana cäsukuypa imatapis lutankunata
ruraptin. Sayno ajayarshi Juan Ösuta maman
nirqan: —Padrinuyki cüra estudiasishunaykipaq
pay kaqman aywakuy, papä.

Sayno niptinshi Juan Ösuqa: —Aywakushaq,
ari padrinümanqa, mamay —nirqan.

Sayno nirshi padrinun kaptin cürata qoykurqan
ashmakunanpaq. Saypitash cüraqa kushish
ashmakur escuëlamanha churarqan. Sayshi escuëla-
chöqa preceptor yachasishqanta yachakunanpa
trukanqa wamrakunata puklapälar kakuq. Saycho
mayqan wamrapis milwanta sutapaptinqa “jimanir-
taq puklapämanki, caräju!” nir azul azulta rikacha-
kuqpaq laqyarqäriq. Saynölashi wamrakunapa
pelötantapis pashtaq pashtaq jaytarqäriq.

Sayno ruraptinshi wamrakunaqa quejakuyarqan
directorman. Sayshi directorqa oficinanman
pushaykur chäpa jananman qonqurpaykasir astar-
qan. Sayno astaykaptinshi directortapis tikrapar

“¡sayno astamänaykipaqqa pitä kanki, caräju!” nir sueñupäkuqpaq kutaykurqan. Sayno kashqanpitashi directorqa escuëlapita jitarirqan.

Escuëlapita sayno jitariptinnashi törriman wisarkur mana chawaypa campanata tukaykar qoyarkuq. Sayno tukaptinshi alwasirqa aywarqan michänanpaq. Michaptinshi alwasirtapis kutayka-murqan törripa ventänarpa pampaman shamuqpaq. Sayno alwasirta kutaykuptinshi autoridäkunaqa cüraman aywarqan quejakuyänanpaq.



¤ 5 ¤

Sayshi cüraqa ima ruraytapis mana kamäpaku runakunata yäsirqan laya waskalawanna jatun kaq campanata warkunanpaq. Sayno rurasirqan tukaptin campanapa watun rachikämur Juan Ösuta nitiypa wanusinanpaq. Say höraqa runakuna cüra yäsishqannöla jatun kaq campanata warkurkuptinski yapay Juan Ösuqa aywarqan campana tukaq. Tukaykaptinshi watun rachikaptin jatun kaq campanaqa jananman jeqamurqan. Sayno jeqamup-tinshi “jo caräju!” nir campanataqa marqarkur jukläman churarqan.

Nirkurnashi aywarqan yapay warkunanpaq läzu ashimuq. Läzuta apaykamurnashi campanataqa yapay warkurkur chachak watarqan. Nirkurnashi padrinun kaqman aywaykur nirqan: —Wilapäshayki, padrinu, ima päsamashqantapis. Tukaykaptimi jatun kaq campanaqa janäman jeqamush. Saytami kananqa mana jeqananpaq läzuwan chachak warkaykamushkä.

Sayno wilapaptinshi cüraqa shonqulancho yarpachakur mansakash rikaparqan.

Saypitanshi Juan Ösuqa cällikunapa puriptin alqukuna kaniptinpis wanuq wanuq jaytarqäriq. Chakrakunaman aywaykurpis runapa soqlunkunatashi seqaypa ushaq. Saynölashi runakunapa kuchintapis uyshantapis wanuq wanuq saqtarqäriq.

Sayno kaptinshi say markacho runakunaqa ajayashpan cürata juezman quejakuyarqan.

☞ 6 ☞

Sayshi cüraqa lapanpita pägapakur ima ruraytapis kamäpakurqansu. Sayshi Juan Ösuta nirqan iglesia rurinman yaykuykur say junaq qoyatila rezakunanpaq. Sayno nirshi Juan Ösuta iglesia rurinman wichqaykurqan. Saycho wichqararshi Juan Ösuqa santukunata pampaman jorquykur puklakurqan. Puklaykashqanchöshi virgen Mariapa umanta pakiriykurqan.

Nirkurnashi altarmán wisarkur ashipakuykash-qancho cürapa sotänantapis tariykur puklakur jatikurqan. Nirkurqa misata rurar cüra upukunan vünutapis lapanta upukurkur shinkash altarcho jitaraykarqan.

Saypitánashi cüraqa aywarqan Juan Ösu rezakushqanta o mana rezakushqantapis rikananpaq. Sayshi yaykuranpaqqa santukuna pichuypa pichush pampacho jitaraykaqta rikarqan. Shumaq tantiyaykunanpaqqa virgen Mariapis uman pakishqashi jitaraykänaq. Sayshi mansakash rikachakushqanchöqa Juan Ösutapis sotänan jatish altar chakincho jitaraykaqta rikarqan. Sayshi aywar kuyurkasinanpaqqa pasaypa shinkash jitaraykänaq. Sayshi kuyusir rikcharkasiptinqa Juan Ösuqa

nirqan: —Padrinu, ¿imanirtaq kayjinanpa pasa jiruruykan?

Sayno niptinshi cüraqa nirqan: —¿Imatataq rurashkanki? ¿Maychi misa rurakunaq vïnü imata upukurkushkanki?

Sayno niptinshi Juan Ösuqa nirqan: —Qampis misata rurar upuqta rikarchaq noqapis ichiklata yawarkurqä. Yawarkupti mishkiptinchaq upukurkurqä, padrinu.

Sayno niptinshi cüraqa ima ruraytapis mana kamäpakur Juan Ösu jatiraykashqan sotänatapis loqtiparir waqtapa qarquriykurqan.

❖ 7 ❖


Saypita warayninnashi cüraqa Juan Ösuta nirqan: —Mulakunawan yunkapa ayway yanta-kamunaykipaq, papä.

Cüraqa yachaylapa sayno nirqan aska leonkuna y tigrıkuna Juan Ösuta saycho mikukurkuyänanaq kashqanta yarparshi. Sayno yarparshi awkis mana väliq mulakunata kamariparqan Juan Ösu yantakuq aywananpaq. Saynölashi mirkapanpaq watyatapis ruraparqan yantakuq aywar mikunanpaq.

Say awkis mulankunata karunakurkur ishkay junaq aywayta Juan Ösuqa yantakuq aywarqan. Yunkaman chaykurshi mulankunapa karunankunata paskarir qewata mikunanpaq qaykurqan.

Nirkurshi say junaq qoyatila yantata seqtaykar Juan Ösuqa qoyerqan. Yantata ayparkasirna waraynin junaq mulankuna shuntamuq aywarshi mulankuntaqa tarirqan leonkuna y tigrikuna mikuykaqta.

Sayshi Juan Ösuqa “¡Muläkunataku mikush-kanki, caräju! ¡Kananqa kikikitami yantata cargo-shayki!” nir jayta jaytarkur leontapis tigratapis waskakunawan sarirqan yantata cargananpaq. Waskawan sariptinshi leonpis tigripis kikinta tikrapayta munayarqan. Jinatashi Juan Ösuqa laqya laqyarkur yantata cargarqan. Yantata cargakurkursi padrinun kaqman qatirqan.



Yantan cargash leonkunapis tigrikunapis markaman yaykuyaqta rikarshi mansakashpan runakunaqa wakpa kaypa qeshpir aywakuyarqan. Iglesia patiunman yaykuyaqta rikarshi cürapis

pasaypa mansakushpan qeshpir aywakurqan. Sayshi Juan Ösuqa pitapis mana rikar kikilan cargankunata paskapakurir leonkunatapis tigriknatapis kutikunapaq jaytaraykar qarquriykurqan. Qarqushqanpita kutiykunanpaqshi tayta cürapis iglesiachöna almatakash puriykarqan.

Sayshi Juan Ösu padrinun kaqman witiykur nirqan: —Padrinu, wilapäshayki ima päsamash-qantapis. Apashqä mulakunatami leonkuna tigrikuna yantakuyashqäyaq lapanta mikukurkuyash. Saymi kikinkunata jayta jaytarkur yantata caramushkä. Manami gustulanwanqa kachaykushkäsu.

❧ 8 ❧

Sayno wilapaptinshi padrinunqa ima ruraytapis kamäpakurqansu. Sayshi lakish yarpachakuykash-qancho yarparkurqan kacharish jäkuq hacienda wayikunacho condenädu tashqanta. Pimaypis say wayiman yaykuq kaqtaqa say condenädu wanusiqli. Sayshi Juan Ösutapis say condenädu wanusinanta munar cüraqa Juan Ösuta nirqan: —Ay hiju, qamqa ali geniuyuqmi kanki. Say jäkuq hacienda wayikunachömi pimay yaykuq kaqtaqa say condenädu wanusin. Say condenäduta kikinta ayway wanuykasimuy, papä.

Sayno niptinshi Juan Ösuqa mana mansakuypa: —Aywä ari, padrinu. ¡Kananmi pii kashqätapis musyamanqa! —nirqan.

Sayno niptinshi cüraqa regatonta kamariparqan condenäduwan pelyananpaq. Sayno kamariparkurshi cüraqa nirqan: —Vincishqaykita musyanäpaq waray saka sakala imaykatapis rupasimunki qoshtämunanpaq.

Sayno yäsishqannölashi Juan Ösuqa tardina say jäkuq wayiman aywarqan condenäduta wanusinanpaq. Sayshi say wayiman chaykur “;degoracias!” nirqan. Sayno niptinshi condenäduqa altuspita “päsakalämuy, taytay” nirqan.

Sayshi juk cuartuman yaykurinanpaqqa kuyaylapaq bancukuna kaykäyänaq. Písupis kuyaylapaqshi kaykänaq. Sayshi altuspita condenäduqa nimurqan: —Pasa sakashqanyaq saycho kaykaq awardientita upukuqno say banculacho jamapaykay, taytay.

Sayno niptinshi Juan Ösuqa upyakuqno pasa sakashqanyaq shuyararqan. Pasa sakarkuptinnashi kuchucho kaykaq mechéruman aksita sarisirqan. Aksita sarirkasiptinnashi altuscho jaqraraypa jaqrarar purir qalaykurqan condenäduqa.

Saypitashishi altuspita juk chankan shikwamurqan pampaman. Sayshi Juan Ösuqa “;imataq kayqa, caräju!” nirqan. Sayno rikaraykaptinshi jukaq chankanna ;jaqraq! nir shikwamurqan. Sayno shikwamuptinpis mana mansakuyupashi rikaraykarqan Juan Ösuqa. Saypitashishi chankaynaq rikraynaq umaynaq cuerpuhan shikwamurqan.

Sayta rikaykurshi “jmansakunä imatachir yarpan caräju!” nir awardientita mas qorkurqan.

Sayno rikaraykaptinshi chankankunaqa say cuerpu man laqakäyarqan. Saypitash i juk rikran shikwamurqan. Saypis juklashi say jitaraykaq cuerpu man laqakarqan. Maylantanashi jukaq rikranpis shikwamur jukla say jitaraykaq cuerpu man laqakarqan. Ultimutanashi umanqa toqu nawi shikwarpamur jukla say jitaraykaq cuerpu man laqakarkuptin kawaykaq runanöna condenäduqa ichirkurqan.

Sayshi condenäduqa jukla Juan Ösuwan pelyar qalaykurqan. Sayshi Juan Ösuqa mana utikaypa mana mansakuypa isuq makinwan wirurqan. Condenäduwan waratila pelyaykäyaptinshi kakash cantarkamurqan. Sayshi condenäduqa: —Vinciykämanki imachi —nirqan.

Sayno niptinshi Juan Ösuqa: —Noqataqa ni leonpis ni tigripis manami vincimashsu. ¡Saysuraq qam vinciykamankiman, caräju! —nirqan.

Sayno nir pelyaykapti lannashi kakash qatina-kuypana cantayta qalaykurqan. Sayshi condenäduqa seqaypa utikash karna Juan Ösuta ruwakurqan kachaykunanpaqna. Sayshi Juan Ösuqa nirqan: —Kacharinäpaq lapan riquëzaykitaraq entregamay.

Sayno niptinshi condenäduqa say haciendayuq pampakushqanta qoritapis qellaytapis perolninp

jorqapämürqan. Sayno jorqapäramurshi pasa warännapaqna kaykaptin condenäduqa “¡aywalä!” nir elaqakäkurqan.

Saynashi Juan Ösuqa cüra nishqannöla pasa waraykaptinna say wayicho tarishqan makwa mödanakunata y limukunata shuntaykur ninawan rupasirqan qoshtänanpaq.

Cüranashi Juan Ösu wanukushqanta yarpar saka sakala rikchakurqan hacienda wayi kaqpa. Sayshi rikärinanpaqqa pukutaynöraq qoshtay sharkuykänaq. Sayta rikaykurshi cüraqa mansakash wayinpa kutikurqan Juan Ösuta imanöpapis wanusiyta mana kamäpakushpan.

Saypita maylantanashi Juan Ösuqa fryupa utikash cüra kaqman chaykur nirqan: —Padrinu, kayraq condenäduwan waratila pelyar punuytapis tariykushkäsu. Jinatami ichipaykämaqta condenädutaqa vincishkä. Vinciptinami perolkunawan pamparaykaqta jorqaparkamar aywakush. ¡Aku maski rikanaykipaq, padrinu!



Sayshi ima kashqantapis musyananpaq jukla Juan Ösuwan cüraqa aywarqan. Chaykur rikanan-paqla seqaypa chipipirshi perolkuna junta qellaypis qoripis kaykarqan. Sayta rikaykurshi cüraqa selläma kushikurqan. Nirkurnashi puëdish-qanta apakurkur wayinpa kutirqan mulanta apananpaq. Say mulawanshi qoyarkurqan qorita y qellayta ashtaykar.

Say qellayta y qorita Juan Ösu condenädupita chaskishqanta mana reclamananpaqshi cüraqa Juan Ösupa mamantana say unay haciendata qoykurqan.

Saynöpashi Juan Ösupa mamanqa haciendayuqna rikakurqan.

﴿ 9 ﴾

Saypitanashi Juan Ösuqa campanata imay hörapis tukaq yapay churakarqan. Sayta michap-tinqa kikin cüratanashi “;michämänaykipaqqa pitaq qam kanki!” nir azul azulta rikachakuqpaq laqyarqan.

Saynashi cüraqa ima ruraytapis mana kamä-pakushpan yarpachakuykashqancho yarparkurqan yakuchu shenqaypa wanusinanpaq. Sayshi Juan Ösuta nirqan: —Wak simpaman jatun barritata päsasiy, hüju.

Sayno niptinshi Juan Ösuqa nirqan: —Saytaqa päsarasishaq ari, padrinu.

Sayno nirshi barritata umrukurkur püsaypa püsär aywaykaq mayuman yaykurqan simpanan-paq. Sayshi chawpiman yaykuylanta seqaypa mirash mayu kaptin barritan umrush hundikäkur-qan. Saychöshi Juan Ösuqa shenqaypa wanurqan. Saynöpashi imaykatapis rurarkur Juan Ösuqa ushakäkurqan.